



Arctic Sea Farm hf.
Aðalstræti 20
400 Ísafjörður

Reykjavík, 6. nóvember 2020
UST202010-092/H.R.A.
08.12.02

Efni: Áminning og krafa um úrbætur

Umhverfisstofnun vísar í bréf dags. 9. október sl. þar sem stofnunin áformaði að áminna Arctic Sea Farm hf, vegna fráviks er skráð voru í eftirliti hjá rekstraraðila í Dýrafirði þann 5. júní 2020. Frestur var veittur til 23. október sl. til að skila inn staðfestingu á úrbótum eða tímasettri úrbótaáætlun.

Frávikin eru eftirfarandi:

- 1. Gr. 1.2 í starfsleyfi.** Skv. starfsleyfi er hámarkslífmassi á hverjum tíma 4000 tonn. Lífmassi fór yfir 4000 tonn í Eyrarhlíð í nóvember 2019 og var yfir 4000 tonnum í þrjár vikur.
- 2. Gr. 3.4 í starfsleyfi og reglugerð 796/1999 um varnir gegn mengun vatns.** Rekstraraðili hefur ekki heimild til notkunar eldisnóta sem eru litaðar með efnum sem innihalda koparoxíð. Kvíar með lituðum nótum hafa verið í notkun á eldisstaðnum við Haukadalsbót síðan seiði voru sett út í maí sl.
- 3. Gr. 3.4 í starfsleyfi.** Hámarkslosun fosfórs er skv. starfsleyfi 10 kg/tonn. Losun ársins 2019 var umfram þau mörk.
- 4. Gr. 5.1 í starfsleyfi.** Vöktunarmælingar skulu vera gerðar í samræmi við áætlun sem rekstraraðili leggur fram. Vöktunaráætlun kveður á um sjósýnatöku við vöktun en ekki voru tekin sjósýni til mælinga í þeim sýnatökum sem hafa verið gerðar á árinu 2020.

Í tölvupósti 13. júlí sl. mótmælti eftirlitsþegi framangreindu frávikum frá gr. 1.2 vegna hámarkslífmassa, og vísaði í bréf frá Arctic Sea Farm og Vaka Fiskeldiskerfum sem send voru Umhverfisstofnun 7. júlí sl. Skv. gögnum rekstraraðila úr Fishtalk var lífmassi í kvíum í vikum 46-48 ársins 2019 yfir 4000 tonnum. Rök eftirlitsþega eru þau að eins og fram komi í bréfi Vaka Fiskeldiskerfa séu 5 % vökmörk á mælingum á lífmassa með Biomass Daily kerfinu og af því leiði að mælingarnar séu ekki svo ábyggilegar að þær verði notaðar sem sönnunargagn. Lífmassi sem mældur hafi verið í vikum 46-48 hafi verið innan við 2% frá 4000 tonna hámarkinu og því innan skekkjumarka mælikerfisins. Auk þess hafi slátrun hafi verið í gangi á þessum vikum þar sem slátrun upp úr einhverjum kvíum hefði seinkað vegna veðurs og lífmassinn hafi því farið nokkrum sinnum yfir hámark inn á milli slátrana en lífmassinn hafi minnkað niður fyrir hámark inn á milli toppa.

Umhverfisstofnun bendir á að skyldi stofnunin taka tillit til vökmarka þyrfti að lækka leyfilegan lífmassa í starfsleyfum m.t.t. þeirra marka, svo að ekki sé farið yfir þau mörk

sem sett eru af Hafrannsóknarstofnun, en starfsleyfi í sjókvíaaeldi eru gefin út m.t.t. burðarþols- og áhættumats Hafrannsóknarstofnunar. Því er ekki tekið tillit til áðurnefndrar mögulegrar skekkju í mælingum á meðalþyngd fiska í kví. Hvað varðar það að seinkun hafi orðið á slátrun vegna veðurs þá verður rekstraraðili að taka tillit til ótryggra veðuraðstæðna í áætlunum sínum og rekstri þannig að frávik frá starfsleyfi eigi sér ekki stað. Stofnunin telur því að krafan um að mældur lífmassi sé ávallt undir 4000 tonnum sé í samræmi við ákvæði starfsleyfis og sé rökstudd.

Umhverfisstofnun veitti frest til að senda inn tímasetta áætlun um úrbætur vegna framangreindra frávíka til 23. október sl. Stofnuninni hefur ekki borist tímasett áætlun um úrbætur né staðfesting á því að úrbætur hafi farið fram og veitir því rekstraraðila áminningu, sbr. 2. tl. 1. mgr. 60. gr. laga nr. 7/1998, um hollustuhætti og mengunarvarnir. Jafnframt er gerð krafa um úrbætur. Umhverfisstofnun veitir rekstraraðila frest til 18. nóvember nk. til þess að skila inn tímasettri áætlun um úrbætur eða koma sjónarmiðum sínum á framfæri, sbr. 13. gr. stjórnáslutlaga nr. 37/1993.

Verði rekstraraðili ekki við kröfum Umhverfisstofnunar um úrbætur innan tilskilins frests er stofnuninni heimilt að ákveða rekstraraðila dagsektir allt að 500.000 kr. á dag þar til úr er bætt, sbr. 1. mgr. 61. gr. laga nr. 7/1998, um hollustuhætti og mengunarvarnir, sbr. 2. mgr. 61. gr. reglugerðar nr. 550/2018, með síðari breytingum. Þær aðgerðir yrðu áformaðar sérstaklega og andmælafrestur veittur.

Umhverfisstofnun bendir á að heimilt er að vísa ákvörðun þessari til úrskurðarnefndar umhverfis- og auðlindamála, sbr. 1. mgr. 65. gr. laga nr. 7/1998, um hollustuhætti og mengunarvarnir. Um aðild, kærufrest, málsmeðferð og annað er varðar kæru fer samkvæmt lögum nr. 130/2011, um úrskurðarnefnd umhverfis- og auðlindamála. Kærufrestur er einn mánuður frá því að kæranda varð kunnugt eða mátti vera kunnugt um ákvörðunina.

Vakin skal athygli á því að áminning þessi verður birt á vefsíðu Umhverfisstofnunar. Jafnframt mun stofnunin birta á vefsíðu sinni sjónarmið fyrirtækisins.

Gjald fyrir vinnu sérfræðings við eftirfylgni vegna frávíka frá ákvæðum starfsleyfis verður innheimt samkvæmt gjaldskrá Umhverfisstofnunar nr. 535/2015, með síðari breytingum. **Gjaldið er 35.244 kr.**

Óski rekstraraðili eftir frekari upplýsingum má hafa sambandi við Helgu Rut Arnarsdóttur í síma 591-2000 eða með tölvupósti á helga.arnarsdottir@ust.is. Gögnum skal skila í pósti til Umhverfisstofnunar eða á netfangið ust@ust.is.

Virðingarfyllst

Skúli Þórðarson
sviðsstjóri

Helga Rut Arnarsdóttir
lögfræðingur

Afrit: Heilbrigðisnefnd Vestfjarða